

## NOTIZIIS PE STAMPE

ai 27 di Jugn dal 2016

### **Sante Catarine, screade la gnove infrastrutture viabilistiche. Eliminât il passaç a nivel “Cumò indevant cu la tangenziâl Sud”**

Nuie plui fermadis a spietâ e duncje nuie plui codis devant de stangje dal passaç a nivel di Sante Catarine intal comun di Pasiàn di Prât. Chel stop che al durave par diviers minûts e che i automobiliscj a vevin di tignî cont intai lôr moviments, al fâs part dal passât. Cun grande gjonde pe comunitât locâl che e spietave chest moment di timp ma ancje par dute la provincie di Udin. Comunitât in fieste lunis ai 27 di Jugn pe inaugurazion de rotatorie in trincee e che e domande a fuart ancje la tangenziâl Sud par une gjestion miôr dal trafic in particolâr chel pesant, par plui sigurece e par mancul impat ambientâl. Chest l'auguri indreçât, in ocasion de scree de gnove infrastrutture viabilistiche che e elimine il passaç a nivel ferroviari, dal president de Provincie di Udin Pietro Fontanini, insieme al vice cun deleghe ae viabilitât Franco Mattiussi, al sindic di Pasiàn di Prât Andrea Pozzo. Unanime la sodisfazion pal completament de opare (5 millions 164 mil e 569 euros l'investiment, 500 lis zornadis di lavôr) in esercizi di dôs setemanis par passâ l'ostacul ae viabilitât corelât al passaç a nivel, il cuart plui critic a nivel talian secont Rfi (rapresentade dal dirigjent Carlo De Giuseppe). “Par fâ la viabilitât plui svelte, al mancje il completament de tangenziâl Sud, opare fondamentâl par gjavâ il trafic pesant su chest as, in particolâr a Sante Catarine e intal teritori di Cjampfuarmit”, al à comentât Fontanini ricuardant che cheste cerimonie e je la ultime che la Provincie di Udin e fâs par chel che al rivuarde lis oparis viariis. Dal Prin di Lui, di fat, la competence su la viabilitât, 1300 km di stradis pe Provincie di Udin e tancj cantîrs realizâts, e passe intes mans de Regjon. “Cheste realizazion e je un dai cantîrs plui impuartants di chest teritori provinciâl. O vin mantignût lis promessis e onorât lis deleghis vudis des Feroviiis e de Regjon”. Su la stesse linie il vicepresidente Franco Mattiussi che al à detaiât lis carateristichis technichis dal intervent. “Al è stât fat un grant lavôr de bande dai nestris technics, des maestrancis de dite e di Rfi che a àn permetût di mantignî vierte la viabilitât veicolâr e ferroviarie dilunc dai lavôrs. Une operazion ciclopiche par che la opare e podès jessi fate cence fastidis”. In merit aes risorsis, “la opare - al à fat presint Mattiussi - e je pe plui part finanziade di fonts dai citadins dal Fvj che la Regjon e à convoiât in cheste realizazion. Il risultât metût a disposizion de comunitât al è un grant investiment che i citadins, cu lis lôr tassiss, a àn fat par eliminâ cheste criticitat”. Il sindic Pozzo al à sotlineât la colaborazion positive tra i ents che e à puartât la opare. “Finalmentri no si fâs la file al passaç a nivel, nuie plui ostacui che, però, a van eliminâts ducj” al à comentât Pozzo che si è zontât ae domande de tangenziâl Sud “opare zimule par un coordinament e une razionalizazion inte gjestion dal trafic, massime chel pesant, fûr dai centris abitâts”.

Sodisfazion e je stade esprimude de assessore regjonâl Mariagrazia Santoro (intervignude su deleghe de Presidente de Regjon Fvj) pe realizazion dal intervent. Une opare di rilevanza regjonâl cemût che al è stât testimoniat plui voltis: dal finanziament iniziâl ae norme *a hoc* (Mai dal 2015) là che si definive la prioritât dal cantîr a nivel regjonâl cu la assegnazion consecvente di 2,5 millions di spazis finanziariis specifics par podê permeti la prosecuzion. La assessore Santoro e à vût agrât a dutis lis maestrancis e ai technics dal cantîr pe gjestion complesse dal stes cence problemis pe popolazion. Cun di plui Santoro

e à rilevât la necessitât de tangjenziâl Sud e al riuart e à fat il pont de situazion: la progetazion e je rivade ae fase definitive cu la redazion di ducj i elaborâts di consegnâ ae comission "Via". E je in fase di valutazion la compatibilitât urbanistiche che e esist par doi Comuns su trê. Dôs a son lis proceduris par lâ indenant: i fonts a son. Santoro si è dite otimiste sul fat che cheste opare e continuerà il so percors intal mût plui svelt pussibil.

La cerimonie si è concludude cu la benedizion dade dal plevan di Pasion di Prât, pre Luciano Liusso e la scree dulà che a àn partipât la Zonte provinciâl di Udin, il president dal Consei provinciâl Fabrizio Pitton, i conseîrs provinciâi Arnaldo Scarabelli, Fabrizio Dorbolò, Gabriele Pitassi, Alberto Soramel, Bruno Nino, Eros Cisilino, Marzio Giau, Zorro Grattoni, aministradôrs dai comuns dongje (i sindics Marco Del Negro par Basilian, Monica Bertolini par Cjampfuarmit, Geremia Gomboso par Listize, Fabio Marchetti par Codroip e l'assessôr Enrico Pizza par Udin), presint ancje Giorgio Damiani president di Fvg Strade, e ancje rapresentants des fuarcis dal ordin.